

■ PUNTG DA VISTA

Dalonder vegnan noss daners?

DA CLAUDIA CADRUVI / ANR

Tschintg da quatter Svizzers crain che las bancas prendian ils daners da spargn per conceder credits a quels che vulan bajegiar ina chasa u a quels che lessan engrondir la fatschenta. Il sistem bancar na funcziuna dentant betg pli uschia. Las bancas creeschan sezzas daners sch'ellas dattan emprests a persunas privatas u ad autras bancas. I sa tracta dal daner scrit u dal daner virtual ch'exista mo pli electronicain – senza valurs e segirezzas realas davostiers.

La gronda part da la populaziun svizra crai anc adina che mo la Banca naziunala dastgia stgaffir daners. Uschia eri en sasez gea prevedì oriundain. Il 1891 han ins fixà en la constituziun che mo la Banca naziunala dastgia stampar bancnotas e batter munaida. L'intent fuva da suttametter il daner al monopol da la confederaziun. Il svilup tecnic ha surpassà quest concept. I na dat oz betg pli mo bancnotas e munaida. I dat il daner scrit u il daner virtual.

Las bancas privatas stgaffeschan en il fratemp 90 pertschient da noss daners. Che quai procura per gronds ristgs è evident sche bancas grondas daventan cun lur bilanzas «too-big-to-fail». L'iniziativa per il daner cumplain less puschè surdar al stadi la surveglianza e pretenda che mo la Banca naziunala dastgia stgaffir daners, er il daner virtual.

En sasez na pretendan ils iniziants gea gnanc insatge uschè spectacular. Els vulan mo che quai che la gronda part da la populaziun pensa daventia realiad. Ils iniziants, tranter els blers professers d'economia e da dretg, possedan adversaris potents. Las bancas vegnan a sa dustar cun vehemenza encunter il daner cumplain.

Ma era sche l'iniziativa fa forsa naufragi a l'urna: Suententer il cumbat da votaziun vegnan quasi tuts Svizzers a savair che betg nossa Banca naziunala, mabain las bancas privatas stgaffeschan la pli-part da noss daners.